

春秋左傳釋人

春秋左傳釋人卷二

河內范照藜乙青篋

諸侯世次中

滕世次

姬姓侯爵周文王子叔繻所封傳九世人春秋其後
稱子蓋時王所黜也至戰國時爲齊所滅或云朱滅
之存泰

滕侯

隱七年卒見經傳名諡年譜莫考

滕侯

隱十一年朝魯見經傳名諡年譜莫考

滕子

莊十六年從齊桓公同盟于幽鉅朝魯時已三十五

年矣或非一人 自是年以後經皆書子

宣公

名嬰齊僖十九年爲宋襄公所執見於經傳世次年
譜皆莫考二十二年從宋伐鄭亦當是此君

昭公

文十二年朝魯不知何年立宣九年卒見傳計十六
年

文公

昭公子宣十年宋伐滕成十三年從諸侯伐秦十六
年卒在位二十五年

成公

名原文公子襄十年以來從晉悼公三駕服鄭三十
一年如魯會葬昭三年卒在位三十六年

悼公

名寧成公子昭四年會楚靈於申十三年盟平邱二

十八年卒在位二十五年

頃公

名結悼公子定十五年如魯會葬哀三年朝魯四年

卒在位二十三年

隱公

名熈母頃公子哀十一年卒在位七年以後不可考

晉世次

姬姓侯爵周武王少子叔虞之後也成王封虞於唐
唐叔子燮父改號爲晉十世至昭侯封其父文侯之
弟成師於曲沃是爲桓叔昭侯五傳爲桓叔之孫武
公所滅鄂侯二年入春秋定公三十一年魯哀公十
四年也又六世至靖公韓趙魏三分其地遷其君爲

家範

鄂侯 名超孝侯子二年入春秋隱五年曲沃莊伯伐翼侯
奔隨在位六年 是年秋周桓王立其子哀侯明年
晉人逆侯於隨納諸鄂故稱鄂侯

哀侯 名光鄂侯子隱五年周桓王立之桓三年曲沃武公
伐翼獲之在位九年 晉人立其子小子侯

小子侯 哀侯子桓七年曲沃武公誘而殺之在位四年 桓
八年曲沃滅翼周桓王命虢仲立哀侯之弟緡

侯緡 哀侯弟在位二十七年莊十六年爲曲沃武公所并
自是晉國遂屬武公矣

曲沃莊伯名鮮桓叔子十一年入春秋隱七年卒在位十七年

武公 名和莊伯子莊十六年并翼周僖王使虢公命以一

軍爲晉侯復舊號曰晉明年卒在位三十九年

獻公 名侂諸武公子莊十八年朝王王賜之玉馬繼而用

士爲謀盡殺桓莊之族閔元年作二軍滅取霍魏韓

諸小國僖五年又滅虢虞國勢日強惟是寵驪姬殺

太子父子之間多慙德而兄弟叔姪之禍自此始矣

僖九年卒在位二十六年

卓子 獻公庶子奚齊異母弟僖九年獻公卒荀息立奚齊

里克殺之又立卓子克又殺之經書在十年 案經

書弑其君故載於此奚齊則列之臣考公族類中

惠公

名夷吾獻公子戎女子姓所生莊二十八年獻公聽

二五之言居之於屈僖六年遭驪姬之禍自屈奔梁

梁伯妻以女及卓子被殺賂秦以求入秦穆公納之

僖十年周襄王使宰周公會齊卿立之爲晉君卽位

先殺里克繼而又殺平鄭祁舉七與大夫等且烝於

賈君而背秦施僖十五年秦穆公伐晉敗之於韓獲

之以歸旋以穆姬言釋之二十三年卒在位十四年

懷公

名圉惠公子梁嬴所生僖十七年爲質於秦秦穆公

以女妻之是爲懷嬴二十二年自秦逃歸明年嗣父

卽位殺狐突二十四年文公入國殺之於高粱在位
一年 案懷公雖被殺然觀其得諡且晉臣稱其父
子曰惠懷則其在位一年自不可沒而文公元年仍
當以傳之二十五年爲正也

文公

名重耳獻公子惠公兄戎女狐姬所生莊二十八年
獻公居之於蒲僖五年遭驪姬之禍自蒲奔狄取狄
女季隗生二子處狄十二年而周流列邦齊桓公秦
穆公皆妻以女惠公卒秦伯納之二十四年殺懷公
入國明年平王室之亂納襄王王賜以溫原等邑遂
有山南河陽之地二十七年謀救宋始作三軍使卻

穀將中軍二十八年使先軫將中軍侵曹伐衛執其
君敗楚師於城濮合諸侯於踐土襄王親勞之於河
陽使上卿三官策命之爲侯伯遂霸諸侯爲五霸之
一而中夏之盟主於是乎始有專屬矣是年冬又作
三行以禦狄三十年與秦圍鄭三十二年卒在位八
年

襄公

名驪文公子母偁始僖三十三年敗秦於殽其三
帥繼而敗狄伐許侵蔡以偁楚一年而退三強不媿
繼霸之主是年使先且居將中軍文二年敗秦於彭
衙六年趙盾將中軍秋八月卒在位七年

靈公

名夷皋襄公子母穆嬴是時趙盾爲政迎公子雍於秦穆嬴責以大義盾不得已立之文七年敗秦於金狐十二年與秦戰河曲十三年復士會於秦宣二年趙盾弑之在位十四年

成公

名黑臀文公子出在周趙盾迎立之仍盾爲政宣八年卻缺爲政九年會諸侯卒于扈在位七年

景公

名孺成公子卻缺爲政宣十二年荀林父爲政救鄭與楚戰敗于鄆十三年殺先穀滅其族十五年滅赤狄潞氏十六年又滅甲氏等大行上黨間拓地數百里是年士會爲政十八年卻克爲政成二年敗齊于

鞏還替衛侵地三年賞鞏之功作六軍四年樂書爲
政五年梁山崩六年遷都新田七年使巫臣通吳八
年殺趙括趙同滅趙氏旋以韓厥言立趙武而反其
田十年疾入薨育陷於廁而卒在位十九年

厲公

名州蒲缺公子樂書爲政成十年景公有疾晉卿立
之以伐鄭稱晉侯不子甚矣十三年合諸侯伐秦敗
之麻隧罷上下新軍十五年執曹伯歸之京師十六
年敗楚師于郟陵射楚子中其目十七年殺三卻滅
其族不君甚矣十八年樂書中行偃弑之在位八年
名周襄公曾孫出在周成十八年樂書等迎而立之

悼公

年十四歲卽位之初用人行政國運一新是年韓厥
爲政襄元年爲宋圍彭城取其叛臣五人以歸四年
聽魏絳之言和戎七年韓厥請老知瑩爲政十年十
一年合諸侯三駕伐鄭鄭服楚不敢爭霸業復振君
明臣忠下和上讓其氣象規模視文公尤爲正大十
三年荀偃爲政廢新軍十四年會諸侯伐秦十五年
卒在位十五年今黜宋襄公通爲五霸之終

平公

名彪悼公子荀偃爲政襄公十六年會諸侯于溴梁
大夫盟執莒邾二君以歸十八年會諸侯圍齊十九
年盟祝柯執邾子士匄爲政二十一年士匄逐欒盈

二十三年殺欒盈滅其族二十五年趙武爲政二十六年執衛侯二十七年趙武會諸侯大夫與楚盟于宋南北分霸晉於是乎始衰二十九年合諸侯大夫城杞昭元年趙武合諸侯大夫再會楚于虢二年韓起爲政夏納齊女少姜秋卒三年再娶齊女四年許楚求諸侯及諸昏五年親送女於邢邱使韓起羊舌肸致諸楚八年築廐祁之宮成石言於晉十年卒在位二十六年 是時楚靈強暴求諸侯則許求昏則許滅陳則不能救未幾而蔡亦隨之伯業盡失於此矣

昭公

名夷平公子韓起爲政昭十二年滅肥十三年合諸侯同盟平邱聽莒邾之訴外魯侯而執其卿失霸更甚雖示威示猷究何補哉十四年滅鼓十六年卒在位六年

頃公

名去疾昭公子韓起爲政十七年滅陸渾之戎二十二年王室亂籍談等帥師助敬王二十五年趙鞅合諸侯大夫于黃父謀定王室二十六年以師納敬王成公般戊戌月二十八年滅祁氏羊舌氏是年秋魏舒爲政三十年卒在位十四年 六卿強橫政在私門納王綏至數年魯侯終難返國伯業之衰也哀哉

定公 名午頃公子魏舒爲政定元年魏舒合諸侯大夫爲
天王城成周舒死范鞅爲政四年會王臣合十六國
諸侯以侵楚可謂盛矣而六卿貪貨其失諸侯乃愈
甚不數年閉齊叛鄭叛衛叛宋叛而魯亦叛十三年
范氏中行氏出奔諸侯皆助之知趙韓魏並強國中
分晉之勢已兆其端哀十三年會于黃池吳亦爭伯
伯業之衰愈不堪問矣立三十一年魯西狩獲麟春
秋終卒在春秋後

鄭世次

姬姓伯爵周厲王少子友之後也宣王封友於鄭爲

王司徒死於犬戎之難其子武公定平王於東都取
號鄆之地都於濟西洛東河南潁北四水間謂之新
鄭莊公二十二年入春秋聲公二十年魯哀公十四
年也戰國時爲韓所滅

莊公

名寤生武公子母武姜二十二年入春秋嗣父爲周
平王卿士因王貳于虢以其子忽與王子交質隱元
年逐其弟段且寘其母不子甚矣三年平王崩以師
取王畿內麥不臣甚矣六年如周朝桓王王不禮
之其好遂絕十一年會齊魯二國入許桓二年與蔡
會于鄧始懼也五年桓王以諸侯伐之桓王戰于緡

高射王中肩春秋已來亂君臣之分當以莊公爲首
昭十一年卒在位四十三年

昭公

名忽莊公太子母鄧曼初爲質於王陳桓公請妻之

隱八年如陳逆婦桓六年帥師救齊十一年莊公卒
祭仲立之未踰月出奔宋人執仲使立厲公十五年
厲公出奔仲復迎之入十七年爲高渠彌所弑在位
二年

子亶

莊公庶子昭公弟高渠彌立之桓十八年爲齊襄公

所殺在位一年 案春秋之初鄭較列邦最爲強盛
伐衛敗燕伐宋敗狄國戴入許歲無虛日迄於拒王

鄭子

射王其橫彌甚是時晉室中分荆蠻僻處南服惟齊
僖小爲振拔然其勢亦祇與鄭等迫莊公既卒昭厲
廢立互相出入國勢已衰至子亶會齊被殺而衰更
甚矣其後齊桓創霸與楚爭之於前則服齊晉文繼
霸與楚爭之於後則服晉楚莊圖霸則服楚矣而襄
悼成僖乃忽事楚而忽事晉晉悼復霸則服晉矣而
簡定獻聲又旣事晉而兼事楚會盟日廣供億日繁
雖執政世有賢臣不過免大國之征討而已豈國運
當衰不可復振與抑亦無有爲如莊公者爲之君與
名儀昭公弟桓十八年祭仲迎於陳而立之莊十三

年齊桓公會北杏國伯明年傅瑕弑之在位十四年
厲公 名突字子元莊公庶子母雍姑桓十一年宋人執祭
仲使立之十五年謀殺祭仲不克奔蔡在位四年既
而殺檀伯入居於櫟莊十四年傅瑕弑子儀而納之
入國卽殺瑕與原繁冬從齊桓會于鄆十六年齊桓
因其侵宋以諸侯伐之楚因其告緩亦伐之南北爭
鄭自是始二十年王室亂和之不克以惠王歸二十
一年納王有功王以虎牢以東之地予之是年卒又
在位七年

文公

名捷厲公子自莊十六年盟幽服於齊者二十餘年

僖五年惑於惠王之言逃首止之盟齊桓以諸侯伐之三年而後乞盟十七年齊桓公卒明年朝於楚遂服楚二十四年襄王避叔帶之難適鄭居于櫟二十八年晉文敗楚於城濮從之盟踐土且相襄王以享晉侯三十年晉秦圍鄭私與秦盟秦使杞子等三大夫戍之而去三十二年卒在位四十五年

穆公

名蒯文公庶子母燕姑先亡在晉僖三十年石甲父等逆之以爲大子以求成於晉三十三年杞子與秦伯謀襲鄭以有脩不克三大夫皆奔文九年楚穆圍北方諸侯始伐鄭諸侯之師救之後因晉取賂於齊

宋而不討其亂臣以爲不足與遂叛晉服楚宣元年
晉以諸侯屢伐之三年卒在位二十二年 案文公
子見於傳者六人曰世子華曰子臧曰公子士曰公
子瑕曰子俞彌除俞彌早卒外四人皆不得其死惟
公子蒯獨存而嗣君位其子孫穆氏大盛以輔公室
既不若陳蔡之蚤滅於強鄰復不如齊晉之代興於
異姓豈非蒯有國香天是啟之其後必蕃之明徵歟
威公 名夷穆公子宜四年因解鼃不食公子朱朱與公子
歸生弑之在位一年初謚曰幽歸生死始改謚曰懿
襄公 名堅穆公長庶子宜四年公子去疾以位讓之因去

疾言並留穆公諸子公族由是強盛宣六年以後兩
事晉楚十一年從楚盟辰陵十二年楚復圍之入其
國遂受盟於楚旣而晉卿救鄭楚敗之邲自是傾心
事楚而楚莊以霸成三年晉以諸侯伐之四年卒在
位十八年

悼公

名費襄公子成五年如楚與許靈訟不勝楚執其二
臣歸而請成於晉遂同盟于蟲牢六年如晉拜成歸
而卒在位二年

成公

名踰襄公子悼公弟成六年楚子重伐鄭晉欒書救
之七年如晉拜師秋楚又伐鄭晉以諸侯救之鄭獲

楚臣鍾儀獻於晉且同盟于馬陵九年受楚賂私會
楚公子秋如晉被執十年晉以諸侯伐之鄭大夫行
滅乃釋而歸之服晉者五年十六年楚以汝陰之田
求成又叛晉卽楚是年晉敗楚及鄭于鄢陵射楚君
中目自是晉屢以諸侯伐之終念傷目之情至死不
肯背楚可謂知恩者矣襄二年卒在位十四年

僖公

名允頑成公子襄二年諸侯成虎牢以偁鄭乃服晉
七年爲公子驪所弑以瘧疾赴於諸侯在位五年

簡公

名嘉僖公子生五年子駟立之時子駟爲政十年盜
殺子駟子國子耳三卿子孔爲政自襄八年後晉楚

交至又兩服之十年十一年晉悼三駕僕之楚不敢
爭子展又善於謀國乃傾心服晉矣十九年殺子孔
子展爲政二十五年子展等討罪入陳二十六年如
晉請釋衛獻公二十七年良霄從晉趙武楚屈建等
會盟於宋於是南北分伯兼事晉楚矣趙武歸公率
七大夫享之垂隴二十八年朝於楚二十九年子展
卒子皮爲政三十年公孫黑攻殺良霄公及諸大夫
盟冬子皮讓子產爲政三十一年朝於晉子產壞晉
館垣昭元年子皮從晉趙武楚公子圍等會于號二
年公孫黑作亂殺之四年從楚子會于申六年子產

鑄刑書七年子產聘於晉且代歸晉君所賜豐氏之

田十二年卒在位三十六年

定公

名寧簡公子子產爲政昭十三年同盟平邱子產爭

承於晉子皮卒十六年晉韓起來聘求玉琛子產不

與十八年鄭大災十九年鄭大水龍鬪於洧淵二十

年子產卒子大叔爲政二十二年王室亂二十四年

公如晉子大叔勸晉卿寧王室二十五年會黃父謀

納王二十八年卒在位十六年

獻公

名蕞定公子子大叔爲政定元年國參會諸侯大夫

城成周四年同會召陵侵楚是歲大叔卒駟歇爲政

六年以楚敗滅許始背楚七年與齊盟於鹹始叛晉
定九年卒在位十三年

辟公

名勝獻公子駒獻爲政是時楚邦新定無志中原晉
霸已衰諸侯皆叛范中行偖亡鄭與齊衛皆助之衰
二年罕達與晉趙鞅戰敗子穀七年宋圍曹救之數
年之中與晉宋時相攻伐國勢似乎少振然公不能
自強祇馴罕兩族支持而已立二十年西狩獲麟之
歲也卒在春秋後

宋世次

子姓公爵出自商王帝乙長庶子微子啟之後成王

春秋左傳卷二十一
三
諫武庚更封微子於宋以奉商祀至穆公七年入春秋景公三十六年獲麟之歲也後至王偃齊楚魏共滅之

穆公

名和宣公弟宣公以位傳之其卒也仍傳位於姪可謂賢矣七年入春秋隱三年卒在位九年

殤公

名與夷宣公子隱三年穆公召大司馬孔父立之四年兩會諸侯伐鄭自是數年屢與鄭互相攻伐桓三年華督弑之在位十年

莊公

名馮穆公子隱三年出居鄭桓二年華督弑殤公迎而立之十一年執鄭祭仲使立公子突自是又與鄭

互相攻伐者數年莊二年卒在位十八年

閔公 名捷莊公子莊十一年大水十二年南宮萬弒之在

位十年

桓公 名御說莊公庶子閔公弟莊十二年長萬弒君立子

游諸大夫殺子游而立之十三年從齊桓公會北杏
旣而背之十四年齊會王人以諸侯之師伐之遂服
於齊僖九年卒在位三十一年

襄公 名茲父桓公太子固請立公子目夷目夷辭乃立僖

九年會盟葵邱十六年石隕鷁退飛十八年以諸侯
伐齊納孝公遂妄思圖霸十九年執滕宣公殺鄫子

而用之不仁已甚二十一年會諸侯爲楚所執旣而
釋之二十三年與楚戰於泖傷其股明年卒在位十
四年 舊以此君爲五霸之一春秋時有伯主會諸
侯而被執者乎今進晉悼公而黜之

成公

名王臣襄公子僖二十四年與楚平遂如楚二十七

年楚以諸侯圍宋求救於晉二十八年晉文公救之
敗楚於城濮遂霸諸侯從此世服於晉矣文七年卒
在位十七年

昭公

名杵臼成公子文七年欲去羣公子致穆襄之族攻

殺二大夫八年襄夫人王姬又殺三大夫蕩意諸奔

魯十年會楚子川於孟諸十一年魯公子遂來聘言
蕩意諸而復之十六年襄夫人王姬與公子鮑謀弑
之蕩意諸從公而死在位九年

文公

名鮑昭公庶弟王姬欲通之不可乃謀弑昭公而立
之文十七年晉以諸侯來討受賂而去宣二年與鄭
戰大棘華元被獲贖之以歸十四年殺楚使人申舟
楚莊聞宋明年華元劫楚子反以盟乃平成二年卒
在位二十二年

共公

名固文公子成九年取魯伯姬十二年華元合晉楚
之成十三年會諸侯伐秦十五年卒在位十三年

平公

名成共公子母共姬卽位之年蕩澤弱公室殺公子

肥華元爲政討而殺之於是魚石何爲人鱗朱何帶

魚府皆奔楚成十八年楚納五人於彭城襄元年晉

卿以諸侯之師救宋圍彭城取五人以歸九年宋災

十年晉以諸侯之師滅偃陽封向戌戊辭以與公是

時從晉悼公三駕服鄭十八年會諸侯圍齊二十六

年殺世子痤二十七年向戌合晉楚之成會趙武屈

建及諸大夫盟於宋自是南北分霸兼事晉楚矣二

十九年如楚中道而反十三年宋災母夫人伯姬卒

諸大夫會澶淵謀歸財於宋旣而不果昭元年向戌

再會諸大夫于號四年使世子佐會楚于申十年卒
在位四十四年

元公

名佐平公庶子芮司徒女棄所生平公殺大子痤而
立之昭十三年同盟平邱十八年宋災二十年華亥
向寧等作亂公殺其子而攻之華亥等奔陳二十一
年華貜殺其弟多僚劫父費遂以叛且召華亥等入
據南里華登以吳師救其族公帥齊戍卒敗之己而
公子城以諸侯之師救宋大敗華氏華氏又求救於
楚卒不能勝二十二年華亥等皆自南里奔楚公之
振奮有爲勝衛獻魯昭多矣是年王室亂二十五年

樂大心從諸大夫於黃父謀納王魯昭公出奔公謀納之如晉卒於曲棘在位十五年

景公名欒元公子定四年從會召陵侵楚六年樂祁如晉被執歷三年卒於晉九年使向巢往逆其尸是時晉霸衰微諸侯皆叛自是宋亦叛之矣因寵向魋十年母弟辰與公子地仲佗等皆奔陳明年入蕭以叛大爲宋患哀八年滅曹執其君殺之十四年西狩獲麟春秋終是歲向魋作亂公召其兄巢攻之皆出奔向氏亡二十六年卒在位四十八年 案傳公無子取公孫周二子曰得曰啟養於宮未定所立公卒大尹

立啟六卿不服共攻之大尹以啟奔楚眾共立得皇
靈樂三族共輔之附記於此

陳世次

媯姓侯爵帝舜裔孫閼父爲周武王陶正王以元女
大姬下嫁其子滿而封之陳以奉虞祀桓公二十三
年入春秋閔公二十一年魯哀公十四年也後三年
爲楚所滅

桓公

名鮑文公子二十三年入春秋隱四年兩助衛伐鄭
巳而納衛石碯言執州吁石厚使衛殺之七年及鄭
平以女妻鄭公子忽桓五年卒在位三十八年

五父 名懷父公庶子桓五年殺桓公太子免自立從桓王

伐鄭明年蔡人殺之在位一年

厲公 名躍桓公太子免弟蔡人殺五父立之桓十二年

卒在位六年

莊公 名林桓公子厲公弟桓十四年從宋伐鄭莊元年卒

在位七年

宣公 名杵臼桓公子莊公弟莊十三年從齊桓公會北杏

服於齊十八年周惠王來逆后惠后歸于京師二十

三年殺太子御寇公子完奔齊僖四年從齊伐楚轅

濤塗被執既而釋之十二年卒在位四十五年

穆公

名欵宣公子爲世子時僖七年盟宵母八年盟洮十九年因宋襄暴虐思齊桓之德會諸侯盟于齊二十一年從楚會孟始服楚二十七年從楚圍宋二十八年晉文敗楚霸諸侯懼而如會未幾卒在位十六年名朔穆公子僖二十八年從晉文會于溫始服晉文二年爲衛請成於晉九年楚伐陳陳敗之獲公子穀旣而懼與楚平明年會楚於息十三年卒在位十八年

共公

靈公

名平國共公子文十四年同盟新城又服晉宣五年叛晉從楚八年及晉平又服晉後通於夏姬九年殺

洩冶十年爲夏姬之子徵舒所弑在位十五年

成公 名午靈公子宣十一年楚莊伐陳殺夏徵舒遂滅陳

公奔晉已而復封陳公乃歸成二年從楚會于蜀自是不與諸夏會盟者十八年襄三年叛楚求成於晉使袁僑與諸大夫盟明年卒在位三十年

袁公

名溺成公子襄四年楚侵陳冬陳圍頓五年會敗晉

以諸侯之師戍之七年再會鄆因楚執公子黃遂逃歸自是不與中夏會盟者又二十年襄二十年公子黃奔楚二十三年公如楚慶虎慶寅以陳叛楚圍陳殺二慶歸公子黃二十四年從楚伐鄭明年鄭入陳

二十七年孔奭會晉趙武楚屈建諸大夫盟于宋於是南北分霸二十八年朝晉昭元年公子招再會諸大夫于號四年會楚靈于申且從伐吳八年公子招殺大子偃師立公子留公自縊而死在位三十五年

惠公

名吳哀公孫大子偃師子昭八年奔楚楚靈奉之伐陳放公子招殺孔奭遂滅陳十三年楚平篡位復封陳立而歸之十八年陳災二十三年從楚救州來爲吳所敗夏髡被獲定四年卒在位二十四年

懷公

名柳惠公子初立從劉文公會召陵侵楚定八年卒在位四年

閔公 名越懷公子哀元年從楚圍蔡六年吳伐陳楚昭救
之卒於城父八年叛楚卽吳十年楚伐陳吳又救之
十四年西狩獲麟春秋終十七年楚惠滅陳被殺在
位二十四年

杞世次

姒姓侯爵武王克商求禹之後封東樓公於杞以奉
夏祀四傳至武公二十九年入春秋後降稱伯又稱
子閔公六年獲麟之歲也戰國時爲楚所滅

武公

二十九年入春秋隱四年莒伐杞取牟婁桓二年朝
魯不敬魯人討之入其國三年求成于魯會於郕六

年并州國遷都淳于八年卒在位四十七年

靖公

武公子桓十三年與魯莒盟于曲池以平莒怨莊十

三年卒在位二十三年

共公

靖公子莊二十一年卒在位八年

德公

共公子莊二十五年娶魯莊公女伯姬二十七年朝

魯降稱伯僖五年卒在位十八年

成公

德公子魯伯姬所生長子也僖五年隨母朝於魯十

四年齊桓公合諸侯城緣陵而遷其都二十三年卒

又降稱子在位十八年 案杞君書卒自成公始且

傳文明曰成公註家乃以史記無此一代爲疑豈傳

文反不足爲憑耶此等迂謬之見最足貽悞後生當一掃而空之

桓公

咎姑容成公弟伯姬次子僖二十七年朝魯不共魯人討而入之三十二年伯姬如魯爲公求婦文十二年再朝魯請絕叔姬而無絕昏未幾所絕之叔姬卒魯又以他叔姬歸公成四年三朝魯請歸叔姬五年叔姬出歸於魯冬同盟蟲牢七年同盟馬陵八年叔姬卒於魯九年公逆叔姬之喪以歸又同盟于蒲十八年四朝魯如晉諸昏以其女妻悼公焉襄六年卒在位七十年 案春秋二百四十二年享國之久未

有如杞桓公者外此惟齊景五十八年曹桓十五
年邾文五十二年楚武五十一年秦文五十年蔡景
四十九年宋景四十八年杞武四十七年楚成四十
六年陳宣鄭文許靈各四十五年宋平四十四年鄭
莊齊桓各四十三年許穆衛靈各四十二年邾定秦
景各四十年又邾儀父入春秋歷四十四年其在位
之年不可考小邾穆公見經傳歷四十二年其立年
亦不詳晉定公至魯哀公末年已四十四年皆附記
於此

孝公 名句桓公子從晉悼公三駕服鄭五同盟伐秦圍齊

皆與焉襄二十三年卒在位十七年

文公

名衞姑孝公弟襄二十九年晉平公使荀盈合諸侯
之大夫城杞并使魯歸杞侵地是年公朝魯求盟昭

六年卒在位十四年

平公

名郁釐文公弟昭七年晉人爲之取魯田十三年同
盟平邱二十四年卒在位十八年

悼公

名成平公子昭三十二年會大夫城成周定四年會
召陵侵楚卒於會在位十二年

隱公

名乞悼公子立未踰年弟過弑之經傳俱不載

僖公

名過弑兄自立哀八年卒在位十九年

閔公

名維僖公子立六年魯西狩獲麟春秋以終卒在春

秋後

春秋左傳釋人卷三

河內范照蔡乙青墓

諸侯世次下

齊世次

姜姓侯爵大公望之後其先四岳佐禹平水土有功
封於呂大公佐武王克商封之營邱受命專征侯伯
十三傳至僖公九年入春秋簡公四年獲麟之歲也
後三君田氏篡之而大公不祀矣

僖公

名祿父莊公子九年入春秋隱三年與鄭盟石門六
年與魯盟艾七年使弟年聘魯十一年會魯鄭入許

桓三年送女姜氏于謹爲魯桓公夫人十四年卒在位二十三年

襄公

名諸兒僖公子桓十八年通於其妹魯文姜遂殺魯桓公秋誘殺鄭君子亹莊元年魯文姜孫於齊二年與文姜會於禚四年會於祝邱冬滅紀五年文姜來如齊七年會文姜於防冬再會於穀八年田於貝邱陸車而返連稱等作亂共弑之而立公孫無知在位十二年

桓公

名小白僖公庶子襄公無道鮑叔牙奉之奔莒莊九年齊人殺無知自莒入國敗魯師於乾時逼魯殺公

子糾納鮑叔言釋管仲之囚用之爲政十一年逆夫
人王姬於魯十三年會諸侯於北杏始圖霸尊王室
攘夷狄天子命爲方伯爲五霸之首十四年宋公背
會會王人及諸侯伐之十六年因鄭侵宋以諸侯伐
之鄭服同盟於幽二十八年楚伐鄭會諸侯救之閔
元年救邢寧魯難僖元年邢遷於夷儀合諸侯而城
之二年合諸侯城楚邱以封衛四年以諸侯侵蔡遂
伐楚楚服受屈完之盟而還五年謀定王世子位合
諸侯會世子鄭於首止六年以諸侯討鄭八年定襄
王之位鄭伯乞盟請服九年盟葵邱天王使宰周公

賜葬十年使陽明會王卿士立晉君十四年合諸侯
城緣陵遷杞十六年王告戎難徵諸侯成周十七年
卒在位四十三年 公自創伯以來四十年中衣裳
之會十有一兵車之會四信義著於天下而恩德懷
於友邦伯之至者近乎王其庶幾乎惟是內寵多人
儲貳未定以致身死國亂奄豎弄權爲天下笑蓋修
身齊家之道未之聞而霸衛貽之咎也惜哉

孝公

名昭桓公庶子母鄭姬桓公屬之於宋襄公桓公卒
諸公子爭立易牙寺人貂乘亂立公子無虧公奔宋
十八年宋襄公伐齊齊人殺無虧乃立公而還十九

年諸侯思桓公之德來盟於齊二十三年伐宋二十
六年伐魯魯以楚師伐之取穀寘公子雍以偏齊蓋
公不能繼述而霸業衰矣二十七年卒在位十年

昭公

名湣桓公庶子母葛嬴僖二十八年從晉文公敗楚
於城濮由是服於晉文十四年卒在位二十年 案

顧寧人謂昭公不當以孝公之名爲諡疑有誤然葛
嬴生昭公已見僖十七年傳正不必過疑古人也

舍

昭公子母子叔姬立未踰年公子商人弑之

懿公

名商人桓公庶子母密姬弑舍自立執昭夫人子叔
姬並王卿士單伯納閭職之妻掘郕鄆父之尸淫暴

無禮文十八年爲閔邲二人所弑莊位四年

惠公

名元桓公庶子母少衛姬先是商人弑舍而讓元元不受及商人被弑齊人賢而立之宣元年魯大夫來

納賂取魯濟西田十年復歸田於魯夏卒在位十年

頃公

名無野惠公子母蕭同叔之女宣十七年晉郤克如齊

公母笑之克怒歸是年執其三大夫既而釋之成二

年伐魯敗衛二國皆求救於晉晉郤克會諸國之師

伐齊大敗齊師公易位而逃幾至亡國卒以寶器賂

晉反魯衛侵地乃盟而去三年朝於晉九年卒在位

十七年

靈公

名環頃公子母聲孟子成十三年會晉伐秦母夫人

通於慶克又通於魯叔孫僑如公不能防閑且信其

讒刑鮑率逐高無咎殺國佐父子皆庸甚矣襄六年

滅萊晉悼公三駕伐鄭使世子光從十五年叛晉伐

魯十六年晉平公合諸侯於溴梁公使高厚往既而

逃歸不與盟是年至十八年凡五伐魯晉合十三國

諸侯之師圍之又幾亡國十九年卒在位二十八年

莊公

名光靈公子母嬖聲姬靈公欲廢之而立公子牙襄

十九年靈公疾崔杼立之殺戎子執牙醢夙沙衛逐

羣公子求成於晉從盟於澶淵可謂能幹豈矣未幾

背盟納晉叛臣欒盈且通於崔杼之妻二十三年用
勇力之臣大舉伐衛以伐晉淫暴昏庸視初政如兩
人焉二十五年爲崔杼所弑在位六年

景公

名杵臼靈公庶子母穆孟姬魯叔孫僑如女也崔杼

立而相之重賂晉以求成自是又服於晉襄二十六
年請衛侯於晉二十七年宋向戌合晉楚暨諸侯大
夫會盟於宋齊與秦不與盟是歲崔杼以家亂自殺
慶封當國二十八年朝於晉諸卿共滅慶氏封奔魯
子雅子尾當國二十九年高止會晉城杞昭元年國
弱會諸侯大夫於號二年晉韓起來逆少姜三年使

晏嬰請繼室於晉冬子雅卒六年如晉請伐北燕納
簡公七年燕人賂以寶器及燕姬受之而還不克納
八年子尾卒十年陳無字逐樂施高驪并其室公子
之高唐陳氏始大十二年納北燕伯於唐夏朝於晉
十三年晉合諸侯於平邱以勢挾之乃受盟十六年
伐徐會諸小國於蒲隧二十一年宋華氏作亂烏枝
鳴戌之二十五年魯昭公出奔公嚳之野并二十六
年會魯侯於郟陵以師納之梁邱據受魯貨不克納
冬彗星見二十九年高張信魯侯於郟三十二年高
張會城成周定四年國夏會召陵侵楚七年與鄭會

於鹹始叛晉九年伐晉十年與魯君會夾谷歸魯侵
地十四年與魯衛救晉叛臣范中行氏哀元年會衛
伐晉五年卒在位五十八年 晉自平公末年伯業
衰微公慨然有代興之志然內無輔弼之臣外無懷
柔之略既不能納魯侯於前又不能用孔子於後救
叛君之臣而伐晉助拒父之子而圍戚倫紀日乖大
權不振美哉室不待智者而知爲陳氏有也悲夫

安孺子名荼景公庶子母嬖嬖景公屬高國二卿立之哀六
年陳乞以計逐高國遂弑之在位一年

悼公 名陽生景公庶子初奔魯哀六年陳乞逆而立之入

年殺胡姬取季姬於魯十年陳乞弑之在位四年

簡公

名壬悼公子哀十一年國書伐魯既而魯以吳師伐

齊戰於艾陵國書死之十四年陳恒殺闕止公怒遂

執公而弑之在位四年是年春秋終

平公

名騫亦悼公子陳恒立而相之專其國政齊自是已

屬陳氏特猶未篡位耳哀十七年與魯會盟於蒙卒

在哀公後

楚世次

芊姓子爵出自顓頊孫重黎之後重黎苗裔熊繹成

王封之荊蠻八世至熊渠始僭王號後畏厲王暴虐

夫之數傳至熊通入春秋又僭王號惠王八年獲麟之歲也復傳十二世而秦滅之

武王

名熊通若敖子蚡昌第十九年入春秋桓六年侵隨八年敗隨中夏始懼九年敗鄧十一年敗鄧十二年伐絞十三年伐羅莫敖屈瑕敗績自殺莊四年伐隨卒於師在位五十一年

文王

名熊賁武王子母鄧曼時鬬郤爲令尹莊六年伐申過鄧鄧三甥請殺之鄧侯不從十年伐蔡執蔡哀侯以歸是爲荆蠻猾夏之始既而蔡哀侯言息媯之美遂滅息而娶息媯十四年又以息媯故再伐蔡入其

國十六年始伐鄭而中夏之患彌深矣是歲滅鄭十九年伐黃還卒於道在位十五年

堵敖 名熊羆文王納息媯所生之長子莊二十二年其弟熊頽弑之經傳不載在位三年

成王 名熊頽堵敖弟息媯次子弑兄自立其叔父公子元爲令尹莊二十三年始聘於魯三十年令尹公子元處王宮淫其母文夫人息媯爲鬬班所殺鬬穀於菟爲令尹僖元年改國名曰楚四年齊桓公以諸侯伐之使屈完求成受盟而退後雖滅弦滅黃然終齊桓之世不敢遷陵諸夏齊桓卒宋襄公圖伯二十一年

執宋公以伐宋既而釋之中夏諸侯從之會盟其勢
又振獫狁二十二年敗宋公於泖過鄭取其二甥女
以歸二十三年滅得臣爲令尹自是圍陳滅蕢伐齊
圍宋歲無虛日二十八年晉文公救宋敗之城濮得
臣自殺爲呂臣爲令尹未幾闕勃爲令尹三十三年
殺闕勃文元年爲其子商臣所弑在位四十六年

穆王

名商臣成王子弑父自立成大心爲令尹文四年滅
江五年滅六與蓼九年囚晉君少圖北方伐鄭侵陳
十年陳蔡鄭宋諸君從之田勢又盛焉十二年大心
卒成嘉爲令尹十三年卒在位十二年

莊王

名旅穆王子成嘉闕般闕椒相繼爲令尹文十六年
滅庸宣三年伐陸渾之戎問鼎於周天王使王孫滿
拒之四年殺闕椒八年滅舒蓼十一年爲艾獵爲令
尹盟辰陵討陳殺夏徵舒遂滅陳以申叔時言復封
之十三年圍鄭入其國鄭君求成盟而去之晉卿救
鄭楚敗之於郟遂霸諸侯爲五霸之一冬滅蕭十四
年宋殺其使人申舟遂聞宋明年宋華元劫子反乃
盟而去十八年卒在位二十三年

共王

名審莊王子公子嬰齊爲令尹成二年侵魯衛以救
齊盟諸侯於蜀五年鄭許二君訟於楚執鄭皇戌及

子國鄭伯怒歸而求成於晉六年嬰齊伐鄭晉救之
七年嬰齊又伐鄭晉以諸侯救之鄭囚鍾儀獻於晉
九年以重賂求成於鄭秋晉歸鍾儀使求成冬公子
辰如晉修好十年晉使糴莧來報聘十二年宋華元
合晉楚之成晉士燮與公子罷盟於宋十五年背盟
伐鄭十六年以汝陰之田賂鄭求成鄭叛晉私與楚
盟晉伐鄭楚救之敗於鄢陵晉射王中目司馬公子
側自殺十八年伐宋納其叛臣魚石等於彭城襄三
年嬰齊卒公子壬夫爲令尹陳叛楚從晉五年殺壬
夫公子貞爲令尹七年圍陳自是屢與晉爭鄭而晉

悼公三駕服鄭霸業再興楚竟不能力爭也十三年卒在位三十一年

康王

名昭共王子襄十四年公子貞卒公子午爲令尹十八年伐鄭不利而還二十一年午卒公子追舒爲令尹二十二年殺追舒遣子馮爲令尹二十五年子馮卒屈建爲令尹滅舒鳩二十六年許男請伐鄭卒於楚爲之伐鄭二十七年宋向戌合晉楚之成屈建會晉趙武及諸侯大夫盟於宋自是同主夏盟矣二十八年魯宋陳鄭之君皆朝於楚未及見而王卒在位十五年是歲屈建亦卒公子圍爲令尹

鄭敖

名麋康王子襄三十年遠罷聘於魯圍殺大司馬爲

掩而取其室昭元年圍會晉趙武及諸大夫於虢冬

圍因其有疾繼而弑之在位四年遠罷爲令尹

靈王

名圉更名虔共王庶子弑君自立昭四年合諸侯於

申執徐子伐吳討齊慶封殺之滅賴五年逆晉平公

女爲夫人七年作章華臺召諸侯落成八年滅陳十

一年殺蔡靈侯滅蔡封公子棄疾爲蔡公十二年使

五大夫圍徐次於乾谿以援之明年公子比等作亂

據國不得歸自縊於芋尹申亥家在位十二年

平王

名棄疾更名居亦共王庶子初爲蔡公昭十三年公

子比公子黑肱入蔡挾之作亂比自立黑肱爲令尹
已而以計殺比及黑肱遂卽位復封陳蔡歸其君蔓
成然爲令尹息民養兵初政頗有可觀未幾聽費無
極之讒納大子建妻而逐大子且殺伍奢父子貽入
郢之禍淫昏已甚伯業所以不振也昭十四年殺成
然陽句爲令尹二十三年陽句卒囊瓦爲令尹二十
六年卒在位十三年

昭王

名王更名軫平王納大子建妻秦女所生二十七年
費無極譖殺卻宛已而沈尹戌言於囊瓦殺無極以
靖國三十一年吳始用伍員謀楚定四年周卿劉文

公合十六國諸侯於召陵以侵楚晉卿求貨於蔡弗
得遂辭蔡侯乞師於吳以伐楚大敗楚師王奔隨
薨王奔鄭沈尹戌戰死吳入郢以班處宮國已亡矣
申包胥求救於秦退吳師王始得反國公子申爲令
尹十四年滅頓十五年滅胡哀元年伐蔡六年救陳
卒於城父在位二十七年

惠王

名章昭王子越女所生立八年春秋終哀十六年白
公勝作亂殺公子申等葉公沈諸梁定亂兼令尹司
馬十七年滅陳公孫寧爲令尹卒在哀公後

秦世次

嬴姓伯禹出有顓頊裔孫女修再傳佐舜禹有功賜
姓嬴是爲柏翳十九傳至非子爲周孝王養馬汧渭
之間封爲附庸六傳至襄公討西戎有功平王東遷
賜以岐豐之地列爲諸侯文公四十四年入春秋穆
公始見經傳悼公十一年獲麟之歲也後十世至惠
文僭稱王五傳至始皇并天下自立爲帝二世而亡
文公襄公子四十四年入春秋隱七年卒在位五十年
寧公文公孫桓四年侵芮爲芮所敗遂會王師圍魏執芮
伯以歸八年卒在位十二年

出子寧公子桓十年歸芮伯十四年卒在位六年

武公 寧公子莊十六年卒在位二十年

德公 寧公子莊十八年卒在位二年

宣公 德公子莊三十年卒在位十二年

成公 德公子閔二年卒在位四年 以上七君入春秋共

計六十二年會盟卒葬不見經傳姑照年表附載於

此僖元年穆公立事實備見經傳始詳而可考矣

穆公 名任好德公子僖十年納晉惠公十五年伐晉戰於

韓原惠公以歸既而釋之二十四年又納晉文公二

十八年以兵從晉敗楚於城濮三十年與晉圍鄭私

及鄭盟使杞子等戍之而去三十三年使孟明等襲

鄭不克還滅滑晉人擊之於穀獲其三帥以支夫人
請釋而歸之仍用孟明爲政文二年伐晉敗於彭衙
三年復伐晉晉人避之遂霸西戎爲五霸之一六年
卒在位三十九年

康公

名營穆公子母晉姬文七年送公子雍晉人不受敗
之令狐晉士會來奔十二年西乞術聘於魯冬伐晉
戰於河曲十三年歸士會於晉十六年從楚滅庸十
八年卒在位十二年

共公

名稻康公子宣二年伐晉圍焦四年卒在位四年

桓公

共公子宣八年晉與白狄伐秦十五年伐晉敗於輔

氏成二年會楚盟於蜀九年與白狄伐晉十一年與晉隔河而盟既而背之十三年晉以諸侯伐秦敗之
麻隧獲其二帥十四年卒在位二十八年

景公

桓公子襄九年乞師於楚伐晉十一年伐晉敗其師
十二年公妹歸於楚爲其夫人十四年晉以十三國
之師伐之二十六年使弟鍼如晉修成夏從楚侵吳
又侵鄭二十七年宋向戌合晉楚及諸大夫會盟於
宋秦不與盟昭元年弟鍼奔晉五年卒鍼復歸在位
四十年

哀公

景公子昭十九年楚平王爲其子建聘公女而自娶

之定五年以師救楚敗吳師楚昭不亡國秦之力也

九年卒在位三十六年

惠公 哀公孫哀三年卒在位九年

悼公 惠公子立十一年春秋終又四年卒在位十五年

許世次

姜姓男爵與齊同祖武王封四岳苗裔文叔於許十
二世至莊公人春秋魯定公六年爲鄭所滅楚復封
之元公卒之明年春秋終戰國初復滅於楚

莊公 隱十一年鄭入許莊公奔衛不知所終至桓十五年
許叔入許是爲穆公入春秋已來計二十五年矣

穆公

名新臣莊公弟卽許叔也莊十六年從齊桓公同盟於葵丘四年從齊伐楚卒於師齊桓公以侯禮葬之
在位四十二年

僖公

名業穆公子僖六年楚圍許自縛以見楚子楚禮而歸之屢從齊桓公會盟桓卒服於楚二十八年晉文公霸諸侯以其不至會再伐而圍之文五年卒在位
三十四年

昭公

名錫我僖公子文十四年從晉盟新城十五年再從晉盟扈宣十七年卒在位三十年

懿公

名夷昭公子成二年從楚救齊年弱楚強冠之三年

鄭再伐許五年訟鄭於楚楚執鄭二大夫由是結怨
十四年鄭再伐許許平以叔申之封明年畏鄭偪請
楚而遷於葉襄三年晉悼公繼霸許不至會使知罃
伐之十六年欲叛楚請遷於晉其大夫不可晉使諸
侯大夫伐之獨鄭伯親往怨由是益深二十六年如
楚請伐鄭卒於楚楚爲之伐鄭而後葬之在位四十
五年

悼公

名買靈公子襄二十七年其大夫從晉楚之卿會盟
於宋昭元年再會於虢四年從楚會申伐吳九年楚
靈遷之於夷十八年楚平又遷之白羽十九年世子

止弑之在位二十四年

斯

悼公癸子定四年從劉文公會於召陵侵楚蓋自文

十五年盟扈已來其君不與中夏會盟百有六年矣

是年又遷於容城六年鄭游速帥師滅之以斯歸在

位十九年

元公

名成鄭以斯歸楚遷其國而復封之立元公哀元年

從楚圍蔡十三年卒在位二十二年明年春秋終

薛世次

任姓侯爵黃帝後奚仲封於薛魯隱公十一年始見

經傳後書薛伯益時王所黜也小國無紀世次不能

詳考戰國時齊滅之

薛侯

隱十一年朝魯與滕侯爭長名諡年譜不可考

薛伯

莊三十一年經書卒名諡年譜不可考

獻公

名穀昭三十一年卒世次年譜不可考 案自襄五

年至二十五年經書薛伯與會盟征伐者十有二下

逮昭三十一年已五十八年矣獻公卒傳云同盟故

名杜注襄二十五年盟重邱未知上距襄五年是一

入否姑識於此以俟考

襄公

名定獻公子昭三十二年其大夫會城成周定四年

從劉文公會召陵侵楚十二年卒在位十三年

比

襄公子定十三年國人弑之在位一年

惠公

名燕哀十年卒在位十二年又四年春秋終

莒世次

已姓子爵少契之後武王封茲與期於莒其君無諡而有號入春秋時其君名號無稽自茲平公以下方可考郊公而後微不復見後四傳而楚滅之

莒子

隱二年盟密見經傳名號年譜不可考

茲平公名期僖二十六年與魯衛盟於向二十八年晉文公

霸諸侯從之盟踐土又會於溫年譜不可考

紀公

名庶其文十八年大子僕弑之年譜不可考自入春

秋已來計一百一十四年矣

渠邱公名朱卽季陀庶其子宣四年魯平莒及鄭莒不從魯
伐之取向成七年始服於晉同盟馬陵九年楚伐之
城潰十四年卒在位三十二年

黎比公名密州一稱買朱鉏渠邱公子襄六年滅鄆八年以
後屢伐魯十六年晉討而執之二十三年齊莊公伐
晉歸襲莒不克三十一年爲其子展與所弑在位三
十五年

著邱公名去疾犁比公長子展與弑父自立去疾奔齊昭元
年羣公子逐展與逆而立之五年卒夷以地奔魯莒

討魯敗於蚡泉十三年從晉盟於平邱
魯於晉晉
爲之執魯上卿明年卒在位十四年

共公 名庚與著邱公弟昭十四年蒲餘侯逐郊公逆於齊
而立之十九年齊伐之公奔紀鄆二十二年齊伐之
公敗其師齊景公自伐之乃受盟明年國人逐之奔
魯在位九年

郊公 著邱公子昭十四年父卒嗣位蒲餘侯逐之奔齊二
十三年共公被逐齊納之二十六年與齊魯會鄆陵
三十二年會城成周定四年從劉文公會召陵侵楚
自是不復見經傳哀十四年春秋終是年餘經書甚

子狂卒不知是邾公否自昭二十四年至是歲計三十八年矣

邾世次

曹姓子爵出自顓頊曾孫陸終第五子晏安之後武王封其裔孫曹挾於邾爲附庸十二世至儀父入春秋後從齊桓公獎王室進爵爲子桓公六年獲麟之歲也戰國時楚滅之

儀父

名克儀父其號也隱元年與魯盟於蔑五年與鄭伐宋桓十五年世子朝魯十七年與魯盟於趯莊十三年從齊桓公會北杏自是進爵爲子莊十六年卒人

春秋已來四十五年矣

瑣

儀父子莊二十八年卒在位十二年

文公

名遷條瑣子僖十九年從宋襄公盟曹南爲宋執郕

子用之二十一年滅須句二十八年從晉文公會於

溫文十三年遷於繹是年卒在位五十二年

定公

名獲且文公子宣元年朝魯十七年盟斷道十八年

戕郕子成六年再朝魯十七年卒在位四十年

宣公

名狝定公子襄元年朝魯從晉悼公三駕服鄭十六

年晉討其伐魯執之明年卒在位十八年

悼公

名華宣公子襄十八年從晉圍齊十九年晉執之使

反魯侵地二十一年庶其以地奔魯二十八年朝魯
昭元年卒在位十五年

莊公

名穿悼公子昭十二年與魯仲孫盟於祲祥十三年
盟平邱愬魯於晉晉爲之執魯季孫意如十八年入
鄆納鄆子之女二十三年愬魯於晉晉爲之執魯叔
孫姑二十五年會黃父二十六年與齊魯盟於郭陵
三十一年黑肱以地奔魯定三年爛於鑑炭而卒在
位三十四年

隱公

名益莊公子定四年從劉文公會召陵侵楚十五年
朝魯又奔魯侯之喪哀七年魯入邾執之以去八年

歸之又無道吳人囚諸樓臺使國人奉太子革爲政

在位也三十年

桓公

名革隱公子哀八年吳囚其父立之立六年春秋終

哀二十二年奔越在位十四年

隱公

哀十年奔魯自魯奔齊二十二年自齊奔越訴吳越

人納之又無道二十四年越執之以歸又在位二年

何

隱公子越執其父立之卒在哀公後

小邾世次

曹姓子爵邾挾之後夷父顏有功於周封其子友於

邾爲附庸魯莊公五年友之曾孫犁來朝魯始見經

傳後從齊桓公獎王室進爵爲子改國名曰小邾其
世次年譜不能詳考春秋後六世而楚滅之

邾邾來邾邾來邾君名莊五年始朝魯立年未詳僖七年再朝
魯稱小邾子已三十七年矣卒年亦無考

穆公 襄七年朝魯從晉悼公三駕伐秦圍齊無役不從昭
三年再朝魯十七年三朝魯已歷四十二年世次年
譜皆不可考

小邾子定四年會召陵侵楚 案是年距昭十七年又二十
年恐非穆公傳無明文可考姑附於此

越世次

姒姓子爵夏少康庶子之後武王封之會稽以奉禹祀二十餘世至允常始見於春秋其子句踐僭王號句踐十五年春秋終後一傳而楚滅之

允常

昭五年使大夫從楚伐吳卽允常也三十二年吳伐

越定五年越入吳十四年卒距昭五年已四十二年

句踐

允常子定十四年吳闔廬伐越句踐敗之槁李射而

殺之哀元年吳夫差入越句踐棲於會稽賂太宰嚭

以求成夫差舍之十三年入吳明年春秋終二十年

闔吳二十二年滅吳夫差自殺乃以兵北渡淮與齊

晉諸侯會周元王賜之胙魯衛失國之君皆往依之

號稱霸王卒在哀公後

平

如不及齊